

四庫全書

集部

欽定四庫全書

集部

洛水集

目錄
卷二

詳校官庶吉士臣翁樹培

主事臣呂雲棟覆勘

覆校官中書臣呂雲棟

校對官助教臣胡予襄

謄錄監生臣張曾誼

欽定四庫全書

集部四

洛水集目錄

別集類三 宋

卷一

制誥

卷二

奏疏

卷三

表箋

卷四

議

卷五

策問

卷六

講義

卷七

記

卷八

序

卷九

題跋

卷十

墓誌

卷十一

行狀

卷十二

祭文

哀辭

卷十三

書

卷十四

尺牘

卷十五

啟

卷十六

致語

卷十七

祝版

卷十八

疏

卷十九

上梁文

卷二十

賦

卷二十一

擬古

卷二十二

五言古

卷二十三

七言古

卷二十四

五言律

卷二十五

七言律

卷二十六

五言絕句

卷二十七

七言絕句

卷二十八

說

卷二十九

贊

銘

卷三十

樂府

臣等謹案洺水集三十卷宋程秘撰秘字懷古休寧人先世居洺水自號洺水遺民紹熙中進士累官禮部尚書端明殿學士贈少師立朝以經濟自任明邵經邦宏簡錄載其同史彌遠矯詔立理宗後受楊后緘金之賜彌遠以是銜之今觀集中上執政書議壅蔽朝廷不公賞罰疑當以是忤彌遠宏簡錄所載未必確也秘詩詞皆不甚擅場至於論備邊

蠲稅諸疏則拳拳於國計民瘼言有關係其
跋洪邁萬首絕句以為不當進於朝而跋張
載西銘則以其欲復井田為不可蓋方正而
達於事理者也序言集本六十卷散失者半
此本乃崇禎己巳其裔孫至遠所刻云乾隆
四十二年五月恭校上

總纂官臣紀昀臣陸錫熊臣孫士毅

總校官臣陸費墀

洛水集原序

道始於太極堯以是傳之舜舜以是傳之禹禹以是傳之湯湯以傳之文武周公洙泗聖人羣三千之士講益明說益備由是而後學者不過服而習之安而行之而已而近世學者乃輒不然思入妄境行入舛途不流於老莊之苦空則歸於篇章之吟詠紛紛籍籍淆亂日甚今玆是集猶有不能盡去亦或有補於世教之萬一觀者其審之洛水遺民自序

吾族自太守元譚公開于晉于梁則有若安國靈洗公
于唐則有若都使灋公自是始荒我汭川之居繩繩相
繼代有顯人迄于有宋尤稱蟬聯郡邑中一時為相者
若文簡公大昌正惠公卓訥菴公元鳳其在敝里則吾
祖少師公也皆照耀汗青輝煌今昔我少師公生具異
穎免時詠冰遂播奇句稍長遂篤慕古人之學耻為章
句習登紹熙進士丞相趙公汝愚奇其文擢冠多士為
忌道學者抑置第二筮仕專任德化屢著異績如在樞

密丘崇幕中出奇策活民兵萬餘人之類一時稱為國士然公慨慷尚氣節以天下為己任常有恢復大志故論當時根本急務用兵機宜往往切中如指掌然至于上書輪對多危言直諫時雖以此重之而亦以是忌之若史彌遠輩皆因而中傷公力求休致乃得出倖閩中以平劇盜功垂成而忌益至公遂再請祠歸觀真公德秀之言可以見公為人矣公歸優游里中者尚十餘年前後召用皆不起加少師致仕其為學本之六經根極

理與醇正閱大平和至足若我公者真有用之經濟哉
今奏議書牘之文具在可攷而知也惜乎時未究其用
耳以推世系本河北洺州故自號洺水遺民有洺水文
集六十卷因久散落熙朝一再刻之僅得三十卷萬曆
戊申年山水暴漲板為漂失不肖遠懼寢久而遂湮也
乃取舊本重訂壽諸剞劂夫有美弗彰後人之責也後
之子孫尚續其緒無令隕墜也崇禎戊辰嘉平月吉裔
孫至遠書

欽定四庫全書

洛水集卷一

宋程秘撰

制誥

理宗即位大赦文

天生烝民而立君所以任父母撫綏之責父有天下而
傳子所以綿祖宗統系之基祇仰先皇自承丕緒不以
天寶為樂惟以萬方為憂懷保小民欽畏上帝消斥姦
佞登崇俊良勤不倦於宵衣儉至形於澣服坐臻感格

金史卷一百一十五
卷一
韋底康平二氣叶調羣生茂豫中原雲附故境日歸允
惟中興之功浸復太平之觀乃以焦勞之久遂愆節適
之宜忍聞憑几之言方切號弓之痛顧令眇薄獲纘休
明仰奉母儀俯臨海寓正皇皇如灼之際加兢兢載惕
之思然創劇推心尚曠萬機之務而政先及物豈稽四
海之恩可大赦天下

諭經筵講讀官詔

朕初纂丕圖亟奉慈訓既御經幄日親羣儒深念進德

立治之本實由典學朝夕罔敢怠忽尚賴諸賢悉心啟迪毋有所隱朕當垂聽益加自勉即令學士院明諭朕意

倉部郎官潘樞除大理少卿詔

朕惟天下國家之本在身每於躬行之際尤所致謹比覽倉部郎官潘樞首疏所奏深契朕心可特除大理少卿以示嘉獎

諭監司守令恤刑詔

昔成王立政之初於庶獄卹謹曲盡其敬忠厚積累罔
圖空虛治道所由昌也朕踐祚以來舉廉戒貪興能拔
滯亦欲郡縣聞風政平訟理也而懦者汨於吏姦莫恕
人命强者輒恃巧心析律貳端久繫株連遂易瘐死其
或叨憤自豐庶威奪貨五過之疵是非舛紊蔑棄中興
民寃莫伸哀矜之意微剝斂之風著豈朕為民父母之
意哉繼自今監司守令各思天牧之重躬務審克無僭
亂辭勿格詔而弗遵勿任情而自肆深培根本共守中

和庶幾羣吏視儀罔敢弗率儻猶翫狎習為蔽欺貪殘
淹留莫之糾刺上負朝廷之委任下辜斯民之宅生則
國有憲章罰加失職非予一人所敢私

太師鄂王岳飛改謚忠穆制

昔在高皇中興炎祚如呂丞相勛實著於勤王如岳鄂
王烈尤高於衛國蓋禦戎復辟耀為社稷之臣而秉事
握樞咸受腹心之寄夫既稽功之無間豈容論德之或
殊頃焉異議之莫齊今也師言之允穆同一辭而作謚

垂萬世以為公故追復少保武勝定國軍節度使武昌
郡開國公贈太師追封鄂王謚武穆岳飛賊河朔之雄
姿熟左氏之兵法遁烏珠於中宵之急拔劉豫於一鼓
之餘西京之地既還河南之境寢復惟其張馬步將山
俘馘之繫故能定業於江南使其合晉絳澤潞豪傑之
謀豈復遺患於今日雖以忠而許國屢形於天語之褒
嘉奈畏敵而急和深沮於權臣之私意此身卒至於莫
保天下迄今以為寃朕獲纘不圖敢忘宿憤方將壯薄

海之義氣可不伸當日之忠魂爰易嘉稱用彰實美鄙
姦夫之遺臭不崇朝而肉寒偉烈士之英風將千秋而
髮豎果孰得而孰失抑可勸而可懲今有名孫久司兵
饒得非忠義之報足驗天人之符噫遺廟我我雖或游
神於古鄂英靈凜凜豈能忘意於中原

故崇政殿說書程頤孫源授籍田令制

勅故崇政殿說書贈直龍圖閣謚正程頤四世孫修職
郎程源爵祿朝廷之名器固能砥礪於一時賢者風俗

之樞機實可作興於百世激勸有道今昔所同睠惟爾
祖之賢一出濂溪之正盡心知性無非根本於大原啟
鑰抽絨用以開明於後學求其嗣裔得爾端良隆然受
道之資甚矣典刑之舊錫之命秩擢寘班聯庶幾風動
於聽聞無或顛冥於邪僻克邁先訓尤殫乃心可依前
修職郎特授行籍田令

故華文閣待制朱熹贈太師追封信國公詔

朕每觀朱熹所著論語中庸大學孟子注解發揮聖賢

之蘊羽翼斯文有補治道朕方勵志講學緬懷典刑深
用歎慕可特贈太師追封信國公諡如故

泔水集卷一

欽定四庫全書

洺水集卷二

宋程秘撰

奏疏

擬上殿劄子

臣仰惟陛下天縱之資根于至仁故君臨海宇二十二年雖變故迭興而訖底康定天佑人助不可誣也獨比年以來災異不一方春生夏長之時萬物焦以枯向也旱敵今及吾邊春既苦旱夏必傷潦不惟此爾有道之

世五星循軌日不食朔月不食望迺去歲之秋月食望
矣日食朔矣而又金星見晝鎮星失行太陰躔高木星
度下類非細變也可不震惕如禍在朝夕哉臣願陛下
剛健輝光日新其德蠲苛賦以培國本去繁刑以壽國
脉顯忠消佞以厲臣節聽言行諫以作士氣一政令之
設施必曰其事果合於天否乎一人才之黜陟必曰其
人果當於天否乎天心何自知之當人心則合天心矣
內而坤極外而大臣相與警戒相為輔拂益進其所已

為交脩其所未逮蓋轉移其象銷弭其災非大有以飭
厲之未見其可也漢陳蕃有言昔春秋之末周德衰微
數十年間無復災青者天所棄也今天於漢眷眷無已
故殷勤示變冀以感悟然則今茲災異雖可懼也猶可
幸也豈非上天之心所以祐國家者尚至望陛下者尚
深乎祐之而無以答其意望之而無以慰其心臣則懼
之雖然因象而知警不難也無象而不忘為難耳人之
常情遇變則懼不見則忘未雨則憂既雨則忽殊不知

天之垂象已示不再災祥未應其象故在元魏之時熒惑見而忽亡崔浩謂入秦必矣後八十餘日熒惑果出東井間一歲秦果當之先正司馬光特著之通鑑以垂萬世則是應之遲疾雖不可計而象不虛示未有無其應者也惟陛下勿以為不見勿以為既往而遽忘之則天下幸甚

乙亥輪對劄子

恭惟陛下天臨海宇二十二年玉食弗御惟服澣衣每

以天下為憂未嘗以位為樂故含齒羣生同心愛戴而
變故相仍旋即消弭豈非天之所佑人之所歸皆陛下
憂勤一念之力邪而陛下之憂曾不解於聖心者臣竊
窺陛下之心上憂祖宗付託之重內憂天下之未治外
憂殘敵之未殄也然以臣觀之則以為未易徒憂者治
內治外臣請次第陳之治內之道多矣蠲蔡京等橫斂
之賦以洗百年之痛詳縣令之試以培太平之基嚴司
理錄參之授以重生民之命展任子三年之期以寬吏

部之闕此治內之凡也而其要必先於清中書之務治外之道多矣創軍號集新軍以杜姦人覬伺之心削歲幣正名稱以為他日強敵之慮選王人核邊備以防倉卒之虞禁賂剝明功籍以伸士卒之氣此治外之凡也而其要必先於重閫外之權昔諸葛亮卷卷於蜀主曰董允等志慮忠純宮中之事悉以咨之將軍向寵曉暢軍事營中之事悉以咨之親賢臣先漢所以興也親小人後漢所以亡也三代而下享國長久無若漢唐然所

以亡天下者有四而外侮不與焉宦者甫息而外戚繼興女禍相仍而藩鎮迭作大抵國必自伐然後人伐之中國治安則外侮退聽矣木必先蠹也然後蟲生之人主清明則四患不作矣聖賢之論治亦曰觀前代之變參當今之勢慮其大者而已矣臣更有獻焉攷之農時已逾芒種天之閔澤猶豫逮今得非陛下之澤未下於民故上天之澤亦尚屯於此乎臣試邑富陽之日當楮幣更新之際目擊州縣奉行失措徒黥籍沒所至紛紛

冤痛之聲達于四境于時三辰失精天地變色蓋至三年然後為旱今州縣之吏因楮幣而徙居者亦既釋之矣編配者未縱焉籍沒者未還焉天意可徙解哉宜詔有司刷辛未之冬暨乙亥之夏凡禁者縱之籍者還之如是而不雨則陛下無愧於天人矣臣昧死取進止

其二

臣聞覘人之國者不以其兵之強國之富土地之廣而惟以風俗觀之西漢之末士大夫崇論議之美而乏經

理之用儒者不畔六經之說而流為虛文州縣有惠養之名而未有經久之政邊方無目前之警而有不可測之虞譬之蒲楫維舟容與安流一旦風濤未知所屆古之人君知天下之將有事也必陰求傑特之才儲之以為他日之用蓋平居無犯顏敢諫之士臨難無仗節死義之人漢之王陵周勃汲黯皆有三代之遺直至若公孫弘輩則如發蒙耳緩急何賴焉方今朝廷清明羣正彙進人才之盛比隆淳熙矣而宏厚奇偉忠節鯁亮之

士尤宜封殖長養之方其無事則朝廷益尊及其有事則大任可屬耳司馬光有言忠厚若王曾剛正如魯師道賢直若薛奎所當信用鄙猥若馬貴良讒諂若羅崇勲所當疎遠人才之生無間今昔上有所好中才激昂是說也若書生之常談實聖時之急務惟陛下與二三大臣重圖之取進止

丙子輪對劄子

臣聞天之道日運而無積聖人之治日新而不窮蓋人

之情故則玩新則肅天下大器也聖人之治天下洗濯
提携時出而用之故晝夜之晦明寒暑之代謝循環而
無端相續於一致者此天之所以為天而聖人之所以
為聖人也恭惟國家萬世之業自藝祖創之太宗定之
真宗飾之至仁宗則守之方其紹述之初悉用安靜之
政然閱時寢久人情不能無玩也於是聖心加以振厲
若開天章閣命輔臣條具當行之事又御資政殿召兩
府侍從手詔問天下事其勤求治道責望太平若不可

以一日安者而又擢端鯁以增諫員則言路通而士氣伸矣出內帑以廣邊儲則財用公而國力裕矣命范仲淹主西事富弼主北事則折衝制勝有其人矣因問邊事而責臣下之不能對則所以豫備不虞者嚴其事矣取臣寮奏疏及其進對凡可采者付中書密院施行則獻計陳謨不為無用矣凡此數條其神斷天運無非興起人心於弛玩之餘而四十二年之治所以光明渾厚始終如一日也恭惟陛下更化之初固嘗登正士以革

姦庸伸讜言以破諛佞以祖宗之法而塞徼倖之門嚴
責實之政以變欺誕之習天清日明風行雷動固已月
異而歲不同矣然物以久而故人以久而玩誠能因已
定之規模而稍加作新之功則黜陟所形而天下悚其
好惡賞罰所及而天下震其威明搜遺拔異以收徯屬
之心聽言行諫以昭容受之實闢功名之塗而使人人
有欣欣不自已之意示信必之權而使天下不敢萌苟
且之風則治日新又日新雖至萬世而無弊可也古之

善圖治者亦惟於安靜不擾之中而每有振厲作為之志故寬不至於弛柔不至於懦平居暇日不動聲色而風采奮揚精神運動自足以鼓舞一世夫苟一切安於逸豫則强者必弱智者必晦敢言者必緘默有志者必退縮天下之治蓋未知其所終矣舜嘗歌曰股肱喜哉元首起哉百工熙哉皋陶又歌曰元首叢脞哉股肱惰哉萬事墮哉然則治之汚隆亦惟陛下與二三大臣加之意而已臣識昏學陋豈足語治卷卷愚衷姑塞明制

惟陛下財幸

其二

臣聞自天地肇分以來有中國則有外國也而惟四方
雲擾割據中原則紊天地之常經失中外之大分未有
甚於此時者然考其始興稽其滅亡率不過數十年石
勒慕容雋各十餘年苻健姚秦三十餘年元魏東西雖
百餘年而不能全有中原之地故自元魏而後奄地之
廣傳世之多未有若女真者肆我祖宗得請于上帝假

手蒙古連歲屏除岌岌之勢千鈞一髮矣然一敵亡一敵生而又中原英豪與夫乘時姦夫變出須臾患生盤糾風塵翕忽平定難期蓋中原腹心也吳蜀荆襄四肢也腹心受病未有四肢獨安者其可不重勤聖慮哉甲子之夏辛棄疾嘗為臣言中國之兵不戰自潰者蓋自李顯忠符離之役始百年以來父以詔子子以授孫雖盡僇之不為衰止惟當以禁旅列屯江上以壯國威至若渡淮迎敵左右應援則非沿邊土丁斷不可用目今

鎮江所造紅衲萬領且欲先招萬人止為是也蓋沿邊之人幼則走馬臂弓長則騎河為盜其眎敵人素所狎易若夫通秦真揚舒蘄濡須之人則手便犁鉏膽驚鉦鼓與吳人一耳其可例以為邊丁哉招之得其地矣又當各分其屯無雜官軍蓋一與之雜則日漸月染盡成棄甲之人不幸有警則彼此相持莫肯先進一有微功則彼此交奪反戈自戕豈暇向敵哉雖然既知屯之不可不分矣又當知軍勢之不可不壯也淮之東西分為

二屯每屯必得二萬人乃能成軍淮東則於山陽淮西則於安豐擇依山或阻水之地而為之屯令其老幼悉歸其中使無反顧之慮然後新其將帥嚴其教閱使勢合而氣震固將有不戰而自屈者又言諜者師之耳目也兵之勝負與夫國之安危悉繫焉而比年有司以銀數兩布數匹給之而欲使之捐軀深入剌取敵之動息豈理也哉於是出方尺之錦以示臣其上皆敵人兵騎之數屯戍之地與夫將帥之姓名且指其錦而言曰

此已廢四千緡矣又言棄疾之遣謀也必鉤之以旁證使不得而欺如已至幽燕矣又令至中山至濟南中山之為州也或背水或負山官寺帑廩位置之方左右之所歸當悉數之其往濟南也亦然又曰北方之地皆棄疾少年所經行者彼皆不得而欺也又指其錦而言曰敵之士馬尚若是其可易乎蓋方是時朝廷有其意而未有其事也明年乙丑棄疾免歸又明年丙寅始出師一出塗地不可收拾百年教養之兵一日而潰百年葺

治之器一日而散百年公私之益藏一日而空百年中原之人心一日而失鄧友龍敗朝廷以邱崇代之臣從邱崇至于淮甸目擊橫潰為之推尋其由無一而非棄疾預言於二年之先者所集民兵皆鉏犁之人拘留維揚物故幾半臣言之崇一日而縱去者不啻萬人此蓋犯招兵不擇之忌也禁旅民兵混而不分爭泗攻壽相戕殆盡此蓋犯兵屯不分之忌也兵數單寡分布不敷人心既寒望風爭竄此蓋犯軍勢不張之忌也十月晦

夜敵人以筏濟兵已滿南岸而劉世顯等熟卧不知遽報寢急倉皇授甲晨未及食饑而接戰一鼓大潰至若烽亭近在路隅一聞邊聲燧卒先遁所至烽烟不舉敵猝至前率不能辦此又犯謀候不明之忌也邱崇經理曾未三月而敵騎已渡淮矣夫往者之轍來者之鑒也覆而不鑒則又前轍耳今日之事固與前日大異向也一於謀人今焉專於自治九重之所宵旰廟堂之所經理將帥之所舉行無一日而或忘也而來自邊方者猶

以為兵屯未分焉兵勢未張焉所招之兵未皆壯勇焉
又言城築之事春夏非時則土氣融液板幹促迫則工
力苟簡異時恐不堅密焉而臣區區之愚竊謂邊方事
宜誠難遙度伏願陛下申詔諸將使之相度山川形勢
覽觀丙寅覆轍某城當築某壕當浚某堡當脩某寨當
葺上而川蜀中而襄漢下而兩淮凡彼之所必攻而我
之所當備某所可設伏也某所當控扼也某所可邀擊
也某地可持守也酌其輕重量其緩急某所當屯若干

也某屯當增若干也大綱細目俾各以所見條具來上而朝廷為之斟酌而行之如其所欲為而責其成功不及今無事之時使之得以盡其所欲言一旦有故彼將曰某城朝廷所築也某兵朝廷所屯也某寨朝廷所脩也某池朝廷所浚也力盡於不當為之所而功遺於所當用之地非吾所與知也於是得以有辭矣昔之英主駕馭將帥或面詰或疏問使之空臆盡言因得以第其才能而占其成否皆若是也雖然凡若是瑣瑣者皆邊

將事耳若關宗社之大計圖不世之偉功則固有李德裕處回鶻之事而可以弭後患种世衡自任邊方之責而不以累朝廷此則未敢遽言也蓋禮樂征伐自天子出惟至神獨斷之李德裕有言述疎而言親者危地卑而意忠者忤臣不量其賤而冒昧及是惟陛下幸赦之

初開講筵劄子

臣聞人主之學與儒生異與儲君亦異儒生之學在於釋訓詁儲君之學在於通大義至於人主之學則不然

貴乎力行而已傳說之告高宗曰非知之艱行之惟艱
又曰王人求多聞時惟建事夫知而必貴於行聞而必
見於事是豈徒知徒聞哉三代而來英君誼辟知以講
學為務者必以功業見於天下至若叔季之世豈無聰
明之君惟其不務君人之大德而好文章之小技至與
臣下較工拙於一章一詠之間而紀綱陵遲政刑敗壞
生民塗炭則未嘗一過而問焉夫如是則又何取於學
哉我宋龍興聖聖相繼觀堯舜之用刑而深懲近代之

密網我藝祖豈徒學乎觀周公之無逸而重戒人主之
自豫我仁皇豈徒學乎觀大禹儉勤而力非人主之貪
心我孝宗豈徒學乎先皇嗣統仰法明謨推其所學而
見之躬行則敬天而愛民進賢而斥佞聖讒說容直言
恤兵而省刑輕徭而減賦嚴將帥之選謹符節之擇用
能三十一年之間方內乂安舊疆浸復卓然有中興復
古之漸是皆學形於治而治本於學也恭惟皇帝陛下
仰膺歷數丕紹基圖飛龍在天萬物咸覩既能以講學

為先必能以躬行為急凡經訓之垂史冊之載事之涉於事親者必反覆講明而躬行於寧神養志之間事之涉於進賢斥佞者必反覆講明而見於觀人察事之際事之涉於嚴監司牧守將帥之選者必反覆講明而見於博採公言之時凡事之關於治體言之涉於教條必辨明審是而力行之若夫多聞以為博多記以為富無益也徒以惑聖志而煩聖聽耳夫如是則志慮堅定聰明益開措之政事功業日隆上有以稱先皇付託之意

下有以報慈幃擁佑之恩上天眷休與宋無極宗社幸甚生靈幸甚

甲申上殿劄子

臣聞天下猶一身也元氣充腹心安手足便然後一身強元氣索腹心病手足不舉則其身危士者國之元氣也民者國之腹心也兵者國之手足也公議明於上則朝廷尊民心安於下則邦本固兵威振於外則國勢強蓋柄此公議者士大夫也維此人心者監司守令也總

此兵政者將帥也士習不競則公議晦而朝廷卑貪吏
不革則民力困而邦本搖將非其人則軍政壞而國勢
弱昔鮑宣有言今朝臣未有骨鯁魁壘之士論議通古
今憂國如饑渴此漢人之所深慮者而比年以來熟爛
委靡風米消磨庸繆若賢便佞若忠高者荒唐卑者蹇
陋陛下褒表忠烈獎異儒先固以名誼風天下矣而士
習若是且漢儒傳會之說雖不足錄然緣物求類變不
虛生其言陰雨以為百姓困乏無以應吏之誅求故愁

悲怨怒遂為水災而比歲多雨雖曰陰盛然民衆為魚
怨氣蟠結今州朶縣剝虎暴螟殘杼軸盡空不異寇至
憑城依社頑不畏人監司不訶州牧不問至若邊守選
擇甚嚴然猶有假備禦之名肆溪壑之欲者陛下一念
惻怛億兆愛戴而州縣之間貪酷若是唐之名將郭子
儀自言受恩塞下制敵行間東西十年前後百戰天寒
拆刃濺血霑衣野宿魂驚飲冰傷骨出入生死所仗惟
天今之怯將能若是乎君賜不入私家蓐食不安軍幙

勝則歸功士卒敗則自罪節制今之庸將又能若是乎
比歲以來兵日瘠將日肥憂驛生肉者雖不乏人而蠱
溺自戕者輒當柄任盜至則擁城自全寇退則寬期躡
後列營萬竈羸若鳶形坐甲戌邊率多凍斃閱圍不闢
而私產連阡戰騎不肥而耕牛被野偏佐不陞驍勇不
別陛下竭民之力以養兵假將之權以固圉而貪庸若
是臣願陛下獎切直之言崇靖退之風厲廉隅之節開
功名之門養其譽望作其銳氣風操端聳者拔之以起

顏俗道德醇茂者隆之以正羣心志慮深長者使之贊
籌帷幄畧沉雄者使之斷國論穆穆其良諤諤其昌則
謀國若元龜重國若大呂矣在外則嚴監牧之選行貪
籍之法宣之命令使天下洗心而易慮寓之黜陟使天
下知避而識趨至若貪令則責之牧守貪守則責之監
司監牧不發則坐以黨姦如是則民生其庶有瘳乎又
能時焉倣先朝歐陽脩分使之意擇公正之士純實之
彥按行邊徼撫勞士卒則諸將之貪廉功狀之是非關

隘之隄脩舟車之美惡城壁之摧壯邊民之疾苦舉得
以周知而列屯諸將人知所畏不敢肆欺於其上矣夫
使朝多鴻碩野無怨民邊無怨兵則根本堅厚精神折
衝以之西取靈武北取燕薊將無施而不可者而況區
區二敵及流民乎惟陛下審思而力行之天下幸甚取
進止

其二

臣竊聞新敵遣介求通而朝廷止其介於山陽不許其

輒至闕下處之固得其宜矣昔漢建武中西域求內附而光武惟閉關以謝之突厥求通於唐而太宗直謂彼我遼絕緩急不可仗二君之識微矣然以臣度之彼決無能為也蓋崛起小戎初非積累連兵歲久寧不傷殘持金許年竟不能滅其力可知也如遼如夏如回紇如女真環列其旁彼豈無反顧之慮是以敵人塊坐窮沙亦既許年不敢一日輒離其穴其勢可想也夫力不能支勢不可出而乃連歲以夾攻邀我者豈非敵人之詐

謂中國為可以虛辭恐喝邪彼匹介之來又豈非意在
於窺覘中國邪伏望朝廷下之制梏力折其萌曉之以
國初入貢之分臨之以天地華夏之威破其盜賊包藏
之姦使之震懾而退至計也如其不然稍示以弱彼謂
其計可行則亡厭憑陵當自此始他日雖食邊臣之肉
何益於事哉似聞金主新立憤其侵擾方將振厲與之
決一旦之命寧肯復與之和哉而又窮沙之與中國東
西相距不啻萬里行者去來不啻周星彼亦何敢置遼

夏反顧之憂涉金敵未亡之境行師萬里與中國為敵
哉又況山東諸郡夏焚之金棄之中國亦置之度外矣
彼之攻邪否邪守邪棄邪何預中國事哉以臣觀之此
決不足慮所慮者蜀耳若淮與襄兵雄地近閩外得人
獨蜀去朝廷萬里去二敵特近惟選諸蜀產之英仁厚
而威斷沉毅而廣博者必數人焉列置名藩以備一旦
之須此則蜀之至計耳惟陛下加聖意焉

輪對劄子

臣竊謂當今之務莫急於備邊而備邊之策莫先於擇將益療疾十年無醫可使用兵十年無將可用信乎愈久則愈知其難也唐之名將李光弼嘗有言曰直而能慮勇而能鬪此千人之將也外貌茫茫中情烈烈知人艱勞恤人饑渴此萬人之將也臨事無懼好謀而成近賢親能日謹一日此十萬人之將也溫良恭遜用心無二見賢進之行法不枉此百萬之將也誠信緩大閑於理亂隱隱軫軫鄰國皆知上達天文下知地勢中察人

情四海之內視如室家此天下之雄將不可敵也嗟乎古人之論將其品級固如此至後世之所謂將者果何如人哉愚而忌偏裨貪而獵士卒守邊則嬰城以自保赴援則迂道以避鋒勇不足以倡三軍智不足以料十里公不足以服衆威不足以御下小戰則劒大敵則犇實敗而言勝無功而希賞此蓋百年之弊有未易以遽革者然則終不可革乎亦惟曰得人而已百年以來臣工之所建明朝廷之所施行亦既不一矣而人才終未

見焉且漢之創業韓信之功也唐之再造李光弼之力也而是二人者皆得於薦者之口薦其可已乎然古之取人初無定說或取於將家或取於卒伍或取於科目或取於盜賊或取於外國孫武所謂為將之道無出信仁勇數者誠使外而監司郡守內而卿監郎曹皆得以所知舉之不拘資格不限員數或仁能恤下或智能料敵勇能鼓衆廉能散財義能捐軀嚴能御下明疏其所長而不求其全然後或以一面或以一軍試之則將才

見矣雖然擇將不難御將為難昔周世宗承五季之衰將士習為驕惰河東之敗一日而斬大將樊愛能等七十餘人然後東征西討無不如志白起於秦可謂有功矣一不受命賜死杜郵漢高帝之待諸將也欲王則王之可誅則誅之蓋御之有道則中人可上縱而不治則上駟斯下矣未用之才有法以舉之已用之人有法以御之則殘敵之殲可期矣由古以來中原有故極亂生治非久不定惟陛下洪其規模廣攬英傑嚴將帥以待

之天下幸甚

其二

臣聞兩稅之重莫甚於今日而州縣之間又從而折納之其為厲民也益慘矣夏稅之有本色絹又有和買絹除折帛之外其二色絹止納本色此舊法也去歲戶部以其有歲弊之積姑令折納一年已即檢舉復納本色矣今聞近甸州郡復抑納錢却差官買絹以發上供其格詔旨困民力孰甚焉此折納夏稅之為民害也昔廢

歷中諸道轉運多求加耗之米謂之潤官甚至盜臣加耗之外復增一斗仁皇謂聚斂過於盜賊遂命止之今州縣斛量非法高大往往以石之七八方輸一石輸未及半常額已足則俾之納糯以為酒本糯或充溢則又俾之納錢易杭而為糯易糯而為錢此折納秋稅之為民害也陛下慮深根本子視元元蠲減之詔無歲不下而州縣之吏壅澤不流椎剝日急近畿且爾況於千萬里之外者哉臣愚欲望陛下嚴飭監司時加體訪合輸

本色不許折錢斗斛耗米一遵常制稍有違戾按發以聞監司故縱則御史劾奏庶幾橫斂少戢民瘼少瘳天下幸甚

其三

臣聞太平之原起於田里縣令之職於民為親故任必三年所以久其職也授必京秩所以重其選也漢室以郎而出宰唐人親試於殿庭凡所以謹之重之者要以為民而已民為邦本本固邦寧其可一日不加之意乎

而比歲以來士習不美人起倖心領印未幾即求速化
兩稅之入率取其贏椎剝之征專於抄籍以之營求上
下要譽當塗間出他岐廉恥道喪倖者一人傲者皆是
心無固志政無定經職所當為一不暇問民之休戚漠
然不聞叔季之世凡貴游之不更事者選人之昏眊無
手筆者皆注縣而去魚肉斯民恣其藉躡民怨盜起朝
廷不知多事之際所宜深察臣愚欲望陛下赫然下令
嚴祖宗三考之法禁椎剝之慘崇寬大之化抑僥幸之

徒旌靖退之士則恩交義結不特使民可貧而不可亂而尊君親上固將可使制梃以撻利兵此久安長治之策也惟陛下幸聽之

其四

臣近侍經幄兩蒙陛下諭及邊鄙之事臣竊思兵非易事不敢輕對然不容終嘿謹條其所聞淮東之寇舉國皆以為難而臣以為不足慮或者以臣為好異臣非敢為異也蓋臣計之熟矣要當原其初而觀之彼其初不

過苦於北方饑饉及畏敵人殺僇故相率而來丐一飽以逃生耳豈復有長志宏畧可以角逐中原哉然聚則為亂飽則思奮此蓋古今物情之常也先正司馬光嘗論西戎名山之人以謂餘衆尚多還北不可入南不受彼將安歸必將据邊城以苟活是亦即人情而論之也夫入人國都而為謀人之事此兵家大忌彼豈不知委身孤城岌岌乎釜魚幕燕哉而猶撞搪叫號於假息之頃者蓋北方之路既絕勢必求營朝暮以延歲月之命

也今將一舉而殲之邪則一日而僇數萬人古無是也
將使之分屯邪彼決不敢信朝廷之不我僂也然觀其
一再自戕其徒冀以自贖自新者其心亦可謂顯白矣
今朝廷察其心納其善而棄其過不過賞其首犒其徒
則彼必俯心懷恩俛首聽命矣夫誰敢後邪何以言之
蓋彼亦人也安得暴露奔迸十年於此而不思安定休
息哉而朝廷於此更能擇老將以一軍令益戰士以壯
軍容厚犒賞以作士氣使吾之根本益壯精神益強然

後明降勅命許以不殺彼亦安得不畏其威感其仁相與變驕悍而為善良恥背叛而慕名義哉此臣所以謂之不足慮者非異論也而臣之所慮者比歲以來風雨失節水潦為菑蓋雨與水陰類也外而強敵內而盜賊咸所當備焉實德脩於念慮之微實政行於日用之際察守令之貪酷者而屏削之取將帥之朘剥者而簿錄之使民和於野士快於壁則易歉而為豐化菑而為祥特反掌耳而又何強敵寇盜之足慮邪且昏墊之菑未

有甚於堯之九年者而堯廷之上大綱小紀日事整飭
焦烈之害未有過於湯之七年者而有商君臣脩明政
刑惟日不給古人之畏天一日為一日之功一歲計一
歲之効君則斷斷行之天則斷斷應之天人相與之際
甚可畏也惟宸衷加念焉

其五

臣聞庸主之可憂未若明主之當憂亂世之可慮未若
治世之當慮蓋自三代而後人主無大失德者皆謂之

明主雖未有失德也然未見其進德之彊天下無大亂也然未睹夫致治之實夫如是安得而不憂且慮邪臣嘗攷天之運矣十五日而一氣應五日而一候至寒暑之代謝日月之往來毫髮不爽千古一期未始一日而不然也至於聖人之法天亦曷嘗一日而不然哉舜之屢省不以一省而遂已也湯之又日新不以既新而或怠也文王之不已成王之緝熙皆未始有自足之心而萌怠忽之念也然當時諸臣所以防閑而規警之者猶

無所不至焉象箸之作若未過也而諫者已二十五人
以為用象不已必用金玉至禹之進諫則又曰毋若丹
朱傲惟慢遊是好舜豈有是哉盤盂有銘几杖有箴湯
之所以自厲其心者可謂至矣而伊尹一德之書猶深
寓其規拂之意坐則銘几卧則銘席成王之所以自防
其心者亦可謂切矣而羣臣敬之之詩周公無若商王
受之誠益致其嚴蓋堯舜三代之君臣無一日不以警
戒為事也漢之武皇唐之太宗天資英偉始初清明今

年召申公明年策仲舒凡土木之事神仙邊功之事俱未萌也而申公已戒之曰為治不在多言顧力行何如耳仲舒亦戒之曰正心以正朝廷而汲黯又曰內多慾而外施仁義武皇惟不能謹其終也卒也輪臺之悔晚矣太宗闢封倫之言是魏徵之說力行仁義躬致太平亦可謂至明不惑矣而蘊古大寶之箴已上之即位之初年其辭尤為挺切如曰惟辟作福為君實難主普天之下處王公之上任土貢其所求具僚陳其所倡是故

恐懼之心日弛邪僻之情轉放豈知事起乎所忽禍生
乎無妄大明無私照至公無私親禮以禁其奢樂以防
其佚勿謂無知居高聽卑勿謂何害積小成大樂不可
極樂極生哀欲不可縱縱欲成災勿內荒於色勿外荒
於禽勿貴難得貨勿聽亡國音內荒伐人性外荒蕩人
心難得之貨侈亡國之音淫勿謂我尊而傲賢慢士勿
謂我智而拒諫矜已巍巍蕩蕩恢漢高大度戰戰慄慄
用周文小心一彼此於胸臆捐好惡於心想如衡如石

如水如鏡勿渾渾而濁勿皎皎而清勿汶汶而闇勿察
察而明我皇撫運扇以淳風民懷其始未保其終使人
以心應言以行天下為公一人有慶又曰以一人治天
下不以天下奉一人壯九重於內所居不過容膝彼昏
不知瑤其臺而瓊其室羅八珍於前所食不過適口惟
狂罔念丘其糟而池其酒而魏徵之在當時亦有十思
之疏見可欲則思知足將營繕則思知止處高位則思
謙降防滿盈則思抑損遇逸樂則思撙節在宴安則思

後患防壅閉則思延納嫉讒邪則思正己行爵賞則思
因喜而僭施刑罰則思因怒而濫此十思也又有十漸
之諫其詞曰陛下貞觀初清淨寡慾今訪怪珍此漸不
終一也陛下貞觀初重於役民今漸奢肆輕用民力此
漸不終二也陛下貞觀初役己以利人今也雖有憂人
之言乃為樂身之事此漸不終三也貞觀初親君子斥
小人今也雖重君子敬而遠之雖輕小人狎而近之此
漸不終四也以至始樸素而終奢靡始信賢而終聽讒

始禮士而終傲忽始深居而終馳騁始自治而終好兵
始愛民而終不恤如是者凡十焉嗚呼人之一心如六
馬一心之御如朽索一日失閑萬里奔逸而況人主之
心宗廟社稷之重土宇民物之衆皆關乎一念之微者
可不知所以養之乎心本靜也物誘之則搖心本明也
欲汨之則昏昔之聖人保之護之操之守之明四目以
廣其見達四聰以公其聽聲色不邇貨利不殖讒說之
必聖邇言之必察使一心清明萬里昭澈政之所當施

令之所當發人之賢與否言之忠與慝莫不坐而燭之
如辨白黑雖欲不治可得乎臣望清光之日久矣仰識
陛下之心純一而有守清明而無累推此以施可以為
堯舜可以為湯文而臣區區之愚猶願陛下守此純一
保此清明始終如一勿移勿怠法盤銘之日新戒無逸
之荒溺上焉有以繼列聖傳心之統下焉有以慰四海
望治之心則天下幸甚

代上殿劄子

臣聞天下郡縣土疆既殊風俗亦異然而其間莫不有百年之利因循而未興者亦莫不有百年之害因循而未除者民有欲而莫與之聚有惡而莫與之去以臣耳目所接無郡無之惟為守臣者憚於建明難於改作上下相蒙率歸苟且或一歲而他遷或二年而代去故往往前後因循無肯留意者不然則分千里之寄厯二年之久其勢足以奔走提封其權足以統臨屬縣築一臺營一觀意所欲為千里響應安有為斯民興利除害而

有不可為者哉又況國家裂土置守固將使之問民疾苦分國顧憂也庸可使之乘朱幡佩銀符一無所建明嘿然而來嘿然而罷哉彼漢唐間號為循吏者攷其所歷莫不顯然皆有可紀之迹如治屯田興水利正田賦建學校其成效實績照耀簡編而非後世之所謂政績者徒空言也臣愚欲明詔大臣自今守臣之郡必使延見邦人博採輿議以咨訪一郡之利病而又遲之半年使之習熟其風土周知其疾苦然後以其一二大者條

具來上勿拘以名件某利可興某害可除某弊可革某
事當建明某法當申嚴必皆灼然合民情行之而必效
傳之而可久者無鹵莽以塞責無誕妄以生事無諱其
難而言其易無利於獨而害於衆朝廷以其條奏付之
後省擇其可行者下之責其成效於二年之間而朝廷
則又加少寬假信之專任之篤不以人言而奪其謀不
以旦暮而急其效二年之間郡秩未滿則亦不以召不
以遷斷斷然必責其成而後已至於誕謾無功誣罔不

實生事擾民無補於國凡若此類者悉重寘典憲以正
欺罔之罪而其言可行行可績量其勞能以示旌擢如
此則海宇之大無利不興無害不除其為明時治道之
助實非小補

其二

臣聞赦過宥罪聖人之格言而數赦有罪非先王之令
典昔之賢君深識治體者莫如唐太宗其語侍臣曰赦
者小人之幸君子之不幸朕即位以來不欲數赦恐小

人恃之輕犯憲章故也昔之賢臣深歷世故者莫如諸葛亮其曰治世以大德不以小惠然則赦之為害自古明君賢相未有不知之者惟其末世陵遲王政不綱事從姑息故頻年數赦長惡惠姦以為斯民之大害曾不思聖人之所謂赦過者蓋為過誤者耳至於故犯無小乃聖人之所必刑者而亦用赦焉幾何不使之肆其姦暴以戕賊夫民哉是故赦不欲數亦不欲先定今三歲一赦大需渥澤至於每歲慮囚雨暘決遣不過恐獄訟

之淹延與刑罰之冤濫耳而有司不悟亦遂以為赦焉
且當郊之歲又有疎決則是一歲再赦矣夫頑惡之民
逆數赦期赦前為姦赦至無罪此赦之所以不欲先定
也一歲再赦則姦暴公行而善良無遺類矣此赦之所
以不可數也且夫國有大慶疏恩海宇亦不過減租蠲
賦賜人之爵及高年酒帛耳而今之為州縣者好行姑
息之小惠不知為政之大體往往有殺人而不死為盜
而不刑者以是為陰德焉不知善良之被其害者之為

何辜哉且福善禍淫天之道也王政之綱也一夫之屈
可以致六月之霜一婦之寃可以致三年之旱逆天道
而惠姦民亦豈聖人配天其澤之意哉晉武帝嘗曰近
世立太子必有赦今世運將平當示之以好惡曲惠小
人朕無取焉遂不赦武帝此言亦不可謂不知理者臣
愚欲乞明詔攸司如盛暑慮囚雨暘決遣但令刑罰中
理不當妄有蠲貸至於雖遇郊恩與非常之赦凡殺人
為盜情理蠹害者亦當遵守祖宗故事並取奏裁無復

有過恩宥滋長姦惡蓋去狼可以牧羊去莠可以殖禾
去惡可以全善所忍者一人所全者不知其幾人也實
天下幸甚

其三

臣治郡亡狀日懼黜幽既竊寬恩更洊郎選慚無毫髮
自效明時而臣所領屬縣有公私困弊臣所目擊者其
敢嫌不以聞臣竊惟松陽為縣實在畿甸而官司圖籍
尺寸不存是致賦租失陷詞訴糾紛役使不均科配不

等富者田連阡陌而匿賦貧者產去稅存而代輸令或
精明尚莫窮其根柢一或庸謬悉受命於鄉胥由是訟
滯賦稽劾去相望臣領郡之始知其被害為深故於本
縣賦租則每為之寬期人戶陳詞則必為之窮究由是
一邑賴以小安然為悠久計則未也臣愚卷卷欲乞聖
慈特頒睿旨令本州及漕臣公共選辟京官之公廉強
敏者以為令許以便宜寬其文法監司守臣無受妄訴
無惑浮言聽其措置根刷版圖或令人戶手實自陳或

令都保互相推糾取見闔縣產土之數無失經界高下
之則一新圖籍以均一縣兩稅之額如坍落漲塞許令
核實去除庶幾賦役均平公私安便實千萬世不窮之
利也異時籍圖既定一無詞訴則乞朝廷別行旌賞仍
乞下吏部將松陽知縣永差京官免注選人尤為幸甚
其四

臣仰惟國家以民養兵以兵衛民兩者各安其所而不
相病今夫內而禁旅外而屯戍又下而廂軍土軍及配

隸之徒各有統屬莫敢侵軼惟比年放停之兵犇潰之卒朝廷雖已招收其在都邑者應募無餘而山谷田野之間以臣耳目所接尚多有之晝則行乞夜則狗偷甚則三五為羣公肆喝取方此歲惡而朝廷虛於賑卹民賴以安獨此害未除民猶以為病又况小盜不戢大盜之招已事昭然不容不監臣竊見諸州禁軍廂軍防城鋪兵往往皆有額闕臣愚欲望聖慈行下諸州如放停及犇潰之兵在其管下即隨闕額收填不惟田里獲安

抑亦緩急足用天下幸甚

高宗皇帝寶訓徽章乞宣付史館劄子

臣等仰惟高宗皇帝中興炎祚盛德大業具見於寶訓一書蓋嘉定六年令丞相所進而先皇經幄嘗誦讀一周也陛下踐祚之始咨命儒臣且誦且講祁寒盛暑靡徹靡懈涉厯四載遂徹瑤篇夫脩己以恭奉親以孝事天以實用賢惟公去佞惟斷寬征以厚田里之生信賞以作士卒之氣惜財用抑濫恩四九載之宏謨七十篇

之與旨陛下皆已遍觀而熟識之矣惟能留聖心而勿墜謹終始以力行上以揚烈祖之耿光下以垂萬世之丕桀臣等深慚固陋獲際休明雖愧盡規之忠敢忘稱美之義欲望聖慈若稽彝典以今終篇宣付史館取進止

辭免除秘書丞兼權右司

寵靈逮下駭懼并中伏念臣備數日畿行周歲齋雖斂粟粗登於常籍而牢盆一洗於羣姦至論激揚茂聞風

采方圖朝夕自力涓塵適會千秋來稱萬壽方帝城之
甫入曾天陞之未瞻迺拜榮光俾還舊列既貳書林之
事載參省掾之聯允惟埏埴之新采覺恩施之重若為
戴荷祇速顛隲仰望公朝特賜敷奏無嫌易命使訖外
庸別選英髦增重班著

辭免除起居舍人

臣伏聽風雷如臨淵谷竊惟柱下之史寔應極東之星
蓋自有唐已號清華之選至于我宋乃參嚴近之聯因

是揆量豈容冒昧伏念某自還使節屢玷除書竄彼周
行尚堪策厲擢之峻切則謂徼逾仰思孝廟之朝嘗可
侍臣之奏立之近側許其直前夫豈徒然必有為者屬
令暫攝猶懼弗勝今使為真益章非據又況紫薇借筆
丹陛飛毫儒生至榮明時盛選云胡二者乃得兼之伏
望公朝特賜敷奏必別求於茂異或姑俾於攝承務得
良材有光記載所有恩命某未敢祇受

辭免兼侍讀皇太后

渙汗四發履薄一忱竊以麗日新明咸仰尊臨於慈極
震雷初號首令趣啓於經幃班行竦聽於徽言綿宇豫
占其泰治然念仰禋於帝學莫先遴簡於儒英必德望
顯昂乃可潛孚於心術必見聞該洽乃能增益於聰明
如臣至愚於道何有儻使承問而無對曷如先事而控
辭伏望皇太后陛下亟寢誤恩別求碩彥上不虛太后
屬望之志下以承聖主時敏之功所有恩命臣未敢祇
受

皇帝

聯翩有命媿懼交衷竊以天子御厯膺圖莫先聞道儒者懷才抱術務在致君矧當紹祚之初尤為進德之始上欲繼百王之正統下欲垂萬世之丕謨肇開講讀之筵宜得鴻碩之彥豈容亡具濫使充員如臣顓蒙今復荒落舊習但知於佔畢大原莫識於指歸使徒誦其口耳之聞何以補於聖明之學伏望皇帝陛下收回誤渥別簡耆英庶幾大闡於微言可以增光於初政所有恩

命臣未敢祇受

辭免除刑部尚書

懇辭恩命未拜俞音情激於中誼不容已竊以班聯八座非他有司得其人則朝廷尊非其人則累盛代况飛龍在天萬物咸覩一黜一陟一詔一令八方為之風靡四表於焉具瞻一當人心天下自服如臣才術無一逾人甫爾儀曹曾未聞其俎豆俄然憲部何以習其條章又况史館經緯玉堂詞掖極一時之清切兼五組之光

華取名過優席寵太甚反觀內省惕若靡寧伏望皇帝
陛下初肅皇綱首嚴宗祀姑令典禮仰奉明禋至若進
讀代言嗣容控免誤恩憲部先乞收還干冒天威殞越
俟命

皇太后

維天益高聽或未下惟人有欲必徹為期選用之間人
主未嘗不審辭受之際人臣必貴自量伏念臣夙揆迂
疎不求聞達始焉干粟惟以養親詎意遭時寢塵法從

廩然知懼甚矣逾涯至若六卿尤為華近必也道德足以範世名節足以表時識慮足以決幾詞章足以華國
人與位稱不忤不疑如臣至愚一無足算容臺充數閱
日幾何玉帛鼓鐘猶未知其名物制詔法令乃遽總於
條章伏望皇太后陛下容覆如天貸其方命照臨若日
察其愚衷章睿哲於能官畧小嫌於反令姑令習禮仰
奉嚴禋至若史館經幃玉堂詞掖盡公朝之清貫極儒
生之至榮深虞一紀之微莫勝五組之重尚容嗣控未

敢併陳干冒天威隕越俟命

辭免除翰林學士

仰承威命俯震愚衷竊以設官本虛得人則重一不當
任何往非輕是用競危期於拱辟伏念臣少涉藝圃晚
荒墨池自忝攝承久慚荒陋方賦曰歸之請併還所假
之官詎意出緡竟令刻印且三王訓誥之作編為六經
而兩都制詔之詞雄稱八代是後員充於六押亦須才
擅於三長惟蟠萬卷於層胸業兼馬鄭故吐萬言於累

牘詞最班揚蓋非學則無以周千古之廢興非識則無以辨萬微之關係然必也筆扛鴻鼎斯能道一人之心則辭落丹青乃可鼓四方之動載稽唐室尤重詞臣且自武德以至開元粲然文體蓋因顏侍以暨蘇頲典我制書既深忌於淹遲尤貴明於體統伏望皇仁俯垂天照亟歛風雷之號無孤雨露之施別簡奇才往當嚴任庶使鴻筆麗藻或能振昭代之文風抑令鯁論宏謨有以贊中書之政本所有恩命臣未敢祇受

戊子乞祠劄子

臣不避顯誅輒申危款伏念臣學膏荒落天質迂愚甘從州縣之曹姑竊斗升之養公朝誤渥驟點清班寧皇特達之知由庶僚而塵法從陛下殊尤之寵自常伯而沔詞林幾載于茲一毫莫効分量既溢神理弗容比侍經筵忽得眩疾賜湯液賜糜粥曲示恩私給鰲炭給掖扶幸逃顛踣由是而後終失其經食飲既虧舉履漸弱右臂麻木兩目昏花一滑為常百藥弗固雖時趨於帝

悞亦日覩於天墀自顧孱羸咸出勉強竊慮因仍不息
氣血日虛訖底疾顛仰孤大造伏望皇帝陛下鑒臨若
日容覆如天念微臣之病侵實陛下之親見察臣非偽
賜臣歸休儻稽溝壑之填尚期湯火之蹈

戊子內引劄子

臣至愚極陋躡冒清華執簡金鑾譚經虎觀日侍清燕
初未五年儒臣之榮何以逾此所當力鞭駑緩仰答鴻
私而臣頻歲以及今春憂患沓至懇祈間退期弭餘菑

而天災流行至于四五臣俯怵私計仰負隆恩則又峻直堯奎須符舜履且特御便殿引令內辭顧遇始終何以稱塞臣山林之影雖移而猷畝之忠故在固嘗攷聖經之紀載參往哲之講明其道不難知其事不難舉然自三代而後時君世主或委之而不為或為之而不竟者非不能也是不為也使其塗轍既正行之而不舛規模既定持之而不息則何治不成何古不復哉臣匆匆去國無以自效也惟以典學養心二言獻之是說也陳

之於口者屢矣今始奏之於牘焉雖然虛辭盛而真積少其弊在乎下聽言多而躬行少其弊在乎上此蓋今昔之所同患者惟陛下加之意焉取進止

辭免除敷文閣學士與宮觀

賦祿祠庭已銘大造陞華奎閣難冒疊恩去少還多感深泣繼伏念臣獨抱孤節謂了一生疇意儉人鑿空造甯訖墮大僂幾絕明時追孽霧之一空乃青天之再睹方作新於聖政示更始於愚臣瓶粟久虛敢不重拜雲

章進直所當控辭提舉玉隆萬壽宮恩命臣已於當日望闕謝恩祇受訖所有敷文閣學士省劄未敢祇受謹寄徽州軍資庫恭望皇慈曲軫天光下臨收還北闕之恩免洿西廂之綴庶安分守永答生成

辭免除寶文閣學士依舊宮觀

綸言誕布奎直躡陞聞命以還震心不已竊念臣蚤塵華近晚試蕃宣盜起鄰封令其招捕是時羣寇出沒三州不啻十萬殿步官兵雖發三千兩月不至臣亟行招

刺驍勇鼓率土豪昭武南劍之間多行剪僂由是羣賊
相率納款十已八九夫何仇曹忌其成功鑿空造謗被
毒十年而某杜門省愆不殊一日敢意天高日照特畀
隆恩欲望公朝曲賜敷奏收還成命免累公言實拜生
始成終之賜

乞休致劄子

臣仰恃隆寬輒伸賤款伏念某孤忠樸學幸際休明被
遇寧皇延登法從繼逢上聖獲睹龍飛兩制八年再司

貢舉詎止宣勤於翰墨固嘗畢力於事功豈虞設穽之
深迄中含沙之毒掩衆長於一己駕已說於他人况大
明方揭於中天豈厚霧能霾於終日天聽甚邇國論不
搖今既及年所當納祿伏望公朝特賜敷奏許令致仕
庶遂初心天地成終之功糜隕不足論報干冒等威俯
伏俟命

繳進耕織圖劄子

臣近因進讀三朝寶訓內農穡門一段云太宗朝有同

州民李元真者獻養蠶經太宗留其書於宮中賜錢一萬臣讀畢奏云紹興間有於潛令樓璘嘗進耕織圖耕則自初浸穀以至春簞入廩織則自初浴蠶以至機杼剪帛各有圖畫纖悉備具如在郊野目擊田家高宗嘉獎宣示後宮擢真六院紹興帥臣汪綱近開板于郡治臣旦夕當繳進一本以備宴覽玉音嘉納之臣今已裝背成帙謹以進呈伏望陛下置之坐隅時賜睿覽一則知稼穡之艱難而崇節儉之化二則念民生之不易而

輕租賦之斂則高宗稱賞其圖之意迄今猶一日也天
下幸甚

再乞祠劄子

臣不避嚴誅游申愚悃臣近者兩表籲天一狀申省乞
從閑退或畀叢祠斬以少弭菑咎伏蒙聖慈一降答制
兩降不允指揮臣不敢久留威命期以一起朝參然後
再陳欵幅今既易月而憂患熏心終不容已伏望陛下
哀矜而垂聽焉竊念臣去冬一疾氣血未復甫及春初

又失長子四歲之呱盡室之號行道之人所不忍聞臣
復何心尚此安坐重念臣庚辰之冬納節歸班九閱歲
華而幼女童孫推者五人三子偕來又失其二纍纍旅
木盡寄郊垌日俟乞骸相與俱返歲復一歲因循至今
寧期一朝又復有此四十之子待以傳家日薄崦嵫僅
餘幼息身既焦灼尚無望於生全心益荒迷豈能脩於
職業伏望皇帝陛下矜其困苦拯其貼危俾備祠宮獲
訪歸路挈此數軀復於故山庶幾少逭於餘殃或可尚

延於殘喘實拜天地生全之賜

其二

臣累具奏狀乞畀叢祠伏準省劄備奉聖旨依屢降指
揮不允不得更有陳請者疊干睿聽實冒嚴誅臣非不
知仰體陛下之隆恩退服陛下之威命然臣積歲亡補
久合投閑巨罰洊罹尚復固位則是臣下不知人道惡
盈之理上不察天運消息之機矧臣少時粗為聞道豈
其既老乃輒冥行重念臣受寧皇之知不為不深蒙陞

下之恩不為不厚豈不願殫尺寸期報萬分而臣分量
已盈菑害日甚前者乞從閑退惟以宿恙未平今茲奇
禍侵陵豈非天孽難逭凡臣困苦之狀迫切之詞具載
前章不敢煩瀆伏望皇帝陛下察臣唯慙與拙一言不
敢為欺念臣諱禍貪榮必將益召陰譴又況明良千載
英俊若林如臣等倫去來孰計所冀乾旋日轉天高聽
卑特降恩言俯從哀請俾死者獲全於正首而存者或
保於餘生銜載恩施何所紀極

再辭免知福州

某昨拜恩綸亟騰免牘繼班詔命未賜俞音感懼交懷
不容自己某竊念閩為重鎮福實大州內揆衰殘其敢
冒昧重念某竊無事之粟已十二年曉夕以思如芒在
背所以連歲卷卷所懇納祿又况漏盡未休神理所忌
老不作壘垂戒前編更望公朝重賜敷奏特寢八州之
命仍恭萬壽之祠庶幾上穆師虞下安愚分戴天履地
沒齒何忘臣下情不任戰栗俟命之至

辭免知贛州

聞命以還措躬無所伏念某學徒泥古用不適宜六經
之間有全謨豈皆空說兩漢而下無長策何取遠功奈
何百未一施老已迫後今者尚蒙軫錄俾効驅馳而臣
已乞垂車豈堪展轡恭望皇帝陛下矜其告憊賜以歸
休凡其未殞之年悉是報恩之日干冒天威臣下情不
任隕越俟命之至

辭免陞修國史實錄院修撰

臣聞善作史者必具三長益非學則無以周千古之變
非識則無以悉當世之事非才則無以揚一代之徽如
臣至愚三者無一向也充員備數或可濫竽今焉因職
陞名豈容專筆伏望皇帝陛下念金匱之重察駑枝之
庸特寢今恩俾仍舊貫當與同列各勉濡毫庶幾襲六
藝之經足為垂萬世之寶臣不勝幸甚所有恩命臣未
敢祇受

泂水集卷二

欽定四庫全書

集部
洛水集卷三
四

詳校官庶吉士臣翁樹培

主事臣呂雲棟覆勘

覆校官中書臣呂雲棟

校對官助教臣胡予襄

謄錄貢生臣孔繼峯

欽定四庫全書

泚水集卷三

宋程琬撰

表箋

天基聖節賀皇太后表

願壽聖人方沸八荒之頌介福王母實均四表之心應
皇家始命之時侈慈極同天之慶中賀恭惟皇太后陞
下道參元化德合太初惟其功在宗祧而不居所以燕
及天心而無已臣日瞻南極星拱東朝雖七秩題期曾

莫伸於虎拜然萬齡紀錄尚益衍於鴻圖

賀皇帝表

天地泰初丕應造基之始宗祧大慶於昭紹統之祥驩
浹兩宮春和八極中賀恭惟皇帝陛下纂聖祖神宗之
服傳明王盛帝之心唯其一視以同仁所以萬年而受
祿臣考先天之易知膺命之符望九色之霞若隔層霄
之霧效三呼之嶽長傾下土之葵

浙西謝表

畢三年之制僅竊餘生司八郡之儲遽蒙誤渥方起家
而拜命俄入境以觀風望近雲天臨深淵谷伏念臣嗜
古雖力施今則膠初無康濟之才徒抱經綸之志平生
疎樸旣懶趨驃騎之門咫尺寒溫亦罕至長安之第習
叨簡拔濫遷周行四閱年華五盼勅目甚慚瑣質疊滂
清資覆載難名消埃莫效迺因積釁今偶未亡敢期一
節之華頓下九霄之峻控辭不獲亟赴所司茲蓋恭遇
吁咈羣言照臨百辟采新田之芑已急儲才樂在藻之

魚尤令當位肆如謏腐亦效馳驅臣敢不愛日程功飲
冰率屬體政和兼領之意務在豐財思淳化設官之原
尤先平糴期殫尺寸仰答萬分

讀高宗皇帝寶訓徹章繳進經筵官詩表

堯書竟秩端由時敏之勤鎬宴疏恩輒玷罔功之賜省
循所被怵惕靡任竊以輟改東都系隆南渡祖宗基緒
復之於艱難險阻之餘朝廷紀綱正之於板蕩陵遲之
後士氣悉摧而獲振道統幾絕而幸傳顧三十六載之

偉烈宏模實億千萬世之重規疊矩爰暨嘉定之六載
始成聖宋之一經故凡更化之集勲莫匪詒謀之有典
皇帝陛下初承寶祚首讀瑤編四閱年華僅周篇帙仰
惟祖訓咸在聖心益高明自得於精微而誦說僅分其
章句今焉霈澤乃爾濫沾綸綍輝煌寵靈赫奕飽八珍
於舜甑沃三酒於堯尊華韞飾注水之奇紫璞範端溪
之產香分仙木茗畀靈芽顧此便蕃若為稱塞臣等唯
有俯陳篇什仰贊恩徽申述丹衷少酬洪造願如成湯

之好學銘盤盂而德日新竊比元和之獻詩奉太后而
天齊壽

謝除吏部侍郎表

纂言西省滿歲偷安贊事左銓一朝誤寵更陞華於史
館仍申命於詞垣控避莫回凌兢以拜中謝竊以周立
冢宰實統官常唐以中書兼領吏部故能區別流品進
退賢愚不以格拘是謂道揆馴至後世分為列曹旣曰
有司但當守法奈何持者不力據者無涯挾故者私干

恃權者公奪條叙旣廢吏謾益紛至若代言尤當遴簡
鄭畋動無滯思管閣同僚陸宸漠不經心毫飛長紙或
九制立揮於退朝之頃或數詞已占於對客之時至若
遣子代為斷牕求本或掩關而謝謁或閉戶以抽書貽
笑當年遺羞往牒敢圖久假竟俾為真伏念臣自量迂
愚不求聞達悠然半世漫爾微官但安寂蔑之濱忽玷
招徠之數更厯華貫點滂清班方終陟屺之篇又賦登
畿之節未周歲籥復覲天威日月幾何風雷翕忽超貳

中曹之事重叅右掖之聯允謂徵逾若為稱塞皇帝陛下寬仁堯舜勤儉禹湯坐觀世故之推遷洞見人才之忠佞遂令寒暄頓冒華腴臣敢不深思所蒙惟當自力銓綜一遵於成憲敷綸必戒於甘辭才雖乏於三長慮尚幾於一得壯行幼學敢少負於明時厲節為忠竊自期於他日

謝除禮部侍郎兼直學士院

選部分曹再周亡補容臺貳事一旦為真合兩制以維

新纂二經而仍舊恩隆莫荷責重難酬伏念臣為學甚
迂受資益慙管蕭往矣分非當世之才箕穎悠然但作
故山之想忽叨抽擢浸服清華言語侍從之臣昔為盛
選內外書命之事兼者幾人豈以凡庸有此超躡皇帝
陛下與天同量立賢無方勇者百鈞每量材而惟稱贊
而千里迺至臣而輒差臣敢不驚者鞭之少展平生之
力月幾望矣終期暮景之全

代浙東提刑謝表

司庾東郊甫終荒政出函西掖就畀祥刑不移舊封悅
驚新命伏念臣愚闇而不逮事行能無以瘡人開黃卷
對聖賢力希前軌向赤霄問岐路絕意榮涂偶被薦揚
浸叨簡拔五年趨闕毫髮無所建明一節渡江筋力不
敢自愛拊摩饑饉蘇醒札瘥謹謹自勞往往無補偶逃
深議力詭後圖冬隙浚波講求水利年豐積廩務欲糴
平以次施行未見經緒少遲旦莫庶露涓塵忽下恩言
俾專臬事方君行仁政務臻三面之寬欲下無冤民尤

謹庶獄之任仰思至意俯揆非才恭惟穆王詳明虞帝
欽恤上慕衣冠之畫先期囹圄之空謂祖宗家法之傳
以仁立國故中外監刑之事奚擇非人矧列王畿尤關
天慮謂臣當一早再滂之歲粗知愛人付臣以二議三
讞之權必無濫法因加推擇亦免將迎臣敢不小大盡
情出入以理嘗聞諸夫子當求無訟之源庶幾如臯陶
仰贊好生之治

代岳州到任謝表

分桂水之符芻纒巨痛付巴邱之印游拜明恩辭軒陛
之崇嚴宣詔條之寬大伏念臣有濟物之志無過人之
才慨念先臣輔皇朝殆逾十稔不肖後嗣望清塵如隔
三生嘗滂中除旋從外補甫畢素冠之制又叨黃紙之
書唯有糜捐或能稱塞恭惟濬堯帝能官之哲深武王
恤遠之仁謂是偏州均為共理念臣已試一壘當諳田
里之隱微察臣久侍上都素識朝家之德意責之來効
或有可觀惟此岳陽實惟湘會厯考晉人之遺跡猶存

杜預之壯圖拱護武昌要識輔車之勢鑿開楊口實為
襟帶之區方當閒暇之時不廢封畧之志臣敢不激昂
自奮平易相安齋公府之心當益守實庠之拙戇固長
江之險或能尋陶侃之規模

賀明堂大禮告成表

躬三歲之祠一奉祖宗之典涓九秋之吉又新神聖之
儀馨德昭聞休祺狎至中賀恭惟皇帝陛下道隆顧諟
敬迪靈承合乾造之太和體皇穹之佑命厯祿清廟精

一意以肅將升禋紫旻格三靈而叶應懽聲所暨際海
惟均臣玉館祈天竹宮望日奉璋文廟阻陪顯相之庭
奏賦太清願繼詞臣之頌

賀元正節表

端平美號已表新元泰和有初當在今日旣盡繼志之
事必慰在天之靈皇帝陛下堯聖盡倫舜稱絕德續紹
已逾於十稔儉勤常若於一朝月之微月之端載戴一
王之制孝之終孝之始永垂萬世之規

慰皇帝表

歷年主器素繫人心一日乘雲難知天道九重悲動四海哀深恭願寬無益之思觀不窮之數丕承眷命方開祖烈之光茂建元良永篤宗祧之慶

謝歷日表

右掖左馮獨望堯雲之近東賓西饒首頌漢歷之新恭惟象日欽天用賢事帝惟不紊義和之命故能推虛昂之星朔同稟於海隅春先回於日出臣敢不式遵乾度

載飭人時正會有儀萬壽叨陪於虎拜歲收不散三農
長慶於魚占

謝數文閣學士提舉隆興府玉隆萬壽宮表

江湖地迫六年深丹闕之恩闔闔天開一日疏紫宸之
渥惟簪履俯憐於舊物故綠緡遠抵於空山戴荷莫勝
感懼何已中謝伏念臣學無他術守但樸忠被遇寧皇
延登法從親覩時乘六龍之日首擢秋官八座之班末
自北門叨守南服雖一髮不慚於俯仰而百謫頓生於

滿盈儻或為議者之言當畀狗猪而不食如其為讒人之妄則投魑魅以何辭固知噬犬以棄人唯欲飯牛而待旦果上聖啓端平之運致敷天絕銜茹之冤六合光芒一洗沉滓皇帝陛下體大易柔剛之義行春秋生殺之權頃焉龍德正中布湯后優優之政今也廟謨獨斷昭文王赫赫之明雖弛張已合時措之宜必沉潛以養高明之克是以上而二氣之叶序下而羣品之昭蘇顧若微臣尤涵大育下祥光於蒙昧之谷回陽和於凝沍

之時進之奎直以華其名賦之祠粟以贍其乏光榮特被報稱難圖臣謹當不負幼聞益堅晚節服堯舜無為之化詠義黃有道之年今幸遇昌辰其憂以天下樂以天下敢不嚴真奉多男祝聖人壽祝聖人

代賀太皇太后還南內牋

神仙別殿頃從文祖之遊閭闔連宮今答神孫之請許年移御此日重還恭惟福備三朝道隆太姒定宗社之大計撫國家之盛時四海之老皆安一人之孝無極臣

肅將明旨欣際熙辰玉闕戢戢長享安寧之養璿源袞袞永觀紹述之休

代賀皇帝表

駕肅東朝幾載極文孫之孝仗還南內一朝開太母之心家國儀刑神明感格恭惟道稽三聖法垂百王謂方鳴蹕清道五日而一朝孰若步輦乘茵終朝而三至懇祈旣力精誠遂孚臣將命奚堪逢辰斯幸寧親神而歡四表聿觀風化之原混天下而為一家行睹規恆之業

代賀皇后牋

望長樂之宮常懷定省接椒房之殿今奉晨昏仰體聖
衷深諧孝德恭惟道參乾極德配坤元屆親蠶繭觀之
辰躬問寢龍樓之節贊謀中禁成典外朝臣身阻班庭
分嚴進牘事光前代薄唐朝西內之淒涼化格敷天動
李密表中之懇惻

代賀平蜀表

殘敵浸平方講內脩之政狂童忽橫輒干自殄之誅宗

社叶休人神共快臣仰思列聖積累之盛實基萬世延
洪之休率土承有截之風含生知面內之義疇謂元惡
敢包禍心忘公朝亭育之恩隕私門忠孝之緒三靈憤
怒九牧囂騰果在須臾悉就摧剪茲蓋聖武不殺至仁
好生雖神戈不至於坤維而皇靈如赫於天際仍俾脅
從之類咸沾蕩滌之恩灑然汚染之區熙若清寧之地
臣肅將明拍幸會熙辰此日藁街已正鯨鯢之戮他年
渭上更來氈毳之朝

代母舅黃寺丞處州謝表

晉丞卿寺莫稱使令退守侯邦又煩推擇經年須戍揆
日合符德意恢洪恪心宣布臣某中謝伏念臣奮身寒
遠遭時休明蚤竊儒科浮湛州縣晚登薦剡點污班行
薄正大農參聯外府備殫綿薄亡補絲毫自請牧人乃
叨乘障瞻言古枯允謂輔藩山深水幽夙名簡靜民貧
土瘠今號窮空何取虛庸恐難稱塞皇帝陛下體乾立
德秉巽行權固本寧邦先於庠下分符置守要在擇人

知臣悃悞無華務行實政謂臣筋力未憊可備前驅况
臣頃獲陞辭嘗伸奏牘興利除害守法奉公凡所建言
肯如空說力圖一得少報萬分牧羊去其敗羣烹鮮期
於不擾上以體朝廷共理之意下以遂田里舉安之心
代總領到任謝表

始承威命甫任將輸旋拜恩言就移給饗仍陞郎選增
重使華沛然天澤之溫凜若淵冰之薄臣竊以環師仰
食固自平時厚稍增屯莫難今日居者行者之皆餽所

謂以十人之食而食五人新籍舊籍之浸多大約以兩月之糧而支一月既屬供調浩繁之際復承術意詳盡之餘優於昔則將奚以加減於前則滋所不可要必變通而無滯庶幾左右之俱宜乃以乏人竟令充位如臣者受資不穎遇事多迂謂幼欲學而壯欲行雖抱卷卷之志然濟時務必須時勝終無犖犖之才方奉詔以飛芻洊更書而總賦初謂朝昏而代匱寧期俄頃以為眞方大計之仰成豈薄能之足倚此益伏遇持兵槃水措

國泰山歌采薇戍役之詩奚憂獫狁壯淮甸藩籬之勢
漸向關河欲於多事之時責以難能之效臣敢不念深
扞圉顧厚本根無橫賦而有贏貲敢不體昔賢之意卧
連營而皆宿飽庶令知天子之恩

謝除禮部尚書表

國有司寇奚補攝承汝作秩宗遽叨眞受祗服龍章之
渥濫陪鴛序之升中謝竊惟政化之機無越禮刑之具
禮既明則刑可措刑雖用而教寔行蓋先王秉德以相

須至後世失經而偏廢將欲復盛時之治必先求當世之才如臣者為學甚迂受資尤薄蚤歲頗期於自見中年益困於無聞仰被先皇特達之知擢寘法從論思之列金匱石室之秘既許濡毫鑿坡鳳掖之間更容兼筆逮皇明之繼作又天寵之頻加首令進誦於金華亟使超司於玉貫榮垂五印報蔑一毫方俟黜幽反蒙獎異丹書尚著未能虛周圍之囚綿叢空存寧復識商臺之禮初承明命寔震愚衷皇帝陛下稟堯舜之聰明而守

之以謙躬禹湯之儉勤而持之不息猶欲急聞忠讜博
覽英奇以光先帝之傳以茂中天之業遂形一札徧及
羣工且元勛猶未覩於加恩而臣等乃例叨於晉列至
如史館嘗備闕員今以遷官又僥陞次外拜華渚內抱
兢惶而臣敢不惟直以清由夙而夜樂同和禮同節尚
當求理義之源經三百曲三千庸敢泥威儀之末

建寧府到任謝表

祈聞五表冀弭餘菑疏渥九重輒叨異數控辭莫遂拜

命知榮中謝竊以南渡宸奎莫峻堯儲之直東甌節鎮
獨高舜履之封唯久班常伯之聯始克稱公朝之寵如
臣者虛庸特甚忝冒尤多歲月因循稱効寂蔑分量既
溢菑害日侵所冀歸休庶幾弭咎幸蒙從欲又拜腴恩
皇帝陛下盛德圖終至仁惠下既厘經筵之侍尤優詞
禁之臣遂使孤蹤亦冒殊寵臣敢不江湖望闕獻畝戴
君付以菟符當開萬井三登之樂畀之祠館尤虔兩宮
萬壽之祈

洛水集卷三